

Powšitkowne WOZJEWJENJA

njedźelu, 29. junija 2014

Duchowna hudźba

Šulerjo Clemensa Kowollika a Friedemanna Böhme wuhotuja njedźelu, 29. junija, we 18.00 hodź. duchownu hudźbu w Budyskej cyrkwi Našeje lubeje knjenje. Zaklinča twórby starych a nowych mištrov. Wobaj wučerjej přewodźetaj šulerjow na piščelach. Zastup je darmotny.

Lětni koncert w Radworju

Chór Meja přeprašuje wšitkich zajimcow na swój lětni koncert njedźelu, 29. junija, na zahrodu před Starej cyrkwičku w Radworju. Wot 15 hodź. poskići so swačina. Koncert zahaji so w 16 hodź. Program wuhotuja nimo Mejanow skupina Přezpólni a mali mejscy pjerachajo. Wšitcy su wutrobnje přeprašeni.

„Tour de Satkula“ wo pokal zbóžneho Alojsa

„Tour de Satkula“ přewjedže Towarstwo Cyrila a Metoda z.t. (TCM) pónđzelu, 30. junija, wot 18.30 hodź. we Worklecach jako kolesowarske wubědźowanje. Po přihotach startuja teamy potom w 20 hodź. Ale přeni džěl maja wokoło wjesneho hata běžeć a smědža so hakle potom na kolesa šwiknyć. Dobyčerskemu mustwu kiwa pokal zbóžneho Alojsa Andrickeho, kotryž spožči TCM. MDR – Radio Satkula chce originalnje wo podawku rozprawjeć.

Předstajenje knihi wo Janje Kilianu

Na knižne předstajenje „Jan Kilian (1811–1884) – Pastor, Poet, Emigrant“ z wudawaćelku Trudlu Malinkowej wutoru, 1. julija, w 19.00 hodź. we wosadnym domje wosady Swjateje Trojicy we Wukrančicach (Hłowna dróha 52) přeprašujetej Ludowe nakładnistwo Domowina a wosada Swjateje Trojicy we Wukrančicach wšitkich zajimcow. Zhromadnje z dalšimi awtorami zběrnika předstaji wudawaćelka najnowše slědźenske wuslědki k skutkowanju fararja Kiliana jako teologa a pěsnjerja kěrlušow, k jeho swójbny m korjenjam a wobstejnosćam jeho wupućowanja do Texasa.

Triduum k stoćinam zbóžneho Alojsa

Z Božej mšu srjedu, 2. julija, w Róžeńčanskej swjatnicy, kotruž budže kanonik Šćěpan Delan z Radworja swjećić, zahaji so triduum k 100. posmjertnym narodninam zbóžneho martrarja kapłana Alojsa Andrickeho, kotryž je so 2. julija 1914 w Radworju narodził. Pěše putnikowanje ze serbskich wosadow kaž hewak na swjedženju Marije wopytanja tón džeń njebudže. Swjatočne kemše budu w Róžeńće w 19 hodź. Dopoldnja w 9.00 hodź. budže tam Boža mša kaž hewak na marijanskich swjedženjach. Druhi džěl triduuma wotměje so štwórtk, 3. julija, w Drježdžanach. W katedrali změje biskop Heiner Koch we 18 hodź. swjatočne kemše składnostnje 100. narodnin zbóžneho Serba. Tomu přizamknjetej so w 19 hodź. swjedženski akt a podijowa diskusija pod hesłom „Sobotna nabožina? K přichodej wěry“. Jezuitski pater Clemens Maas, nawoda Katolskeje akademije, rozłóži, zo tči za wurazom „sobotna nabožina“ něšto podobne kaž swjata sobota. „To, štož je było, je nimo a njemóže so hižo wospjetować. Ale to nowe njeje so hišće spočało. A tola móžeš hižo něšto z toho noweho začuwać. W tajkej fazy podobnje kaž swjatu sobotu wučomnicy smy my wokomiknje w cyrkwi. K tomu chcemy tezy předstajić a wo nich diskutować“, rjekny pater Maas. Wjeršk triduuma budže putnikowanje cyłeje diecezy njedźelu, 6. julija, do Róžanta. Biskop Koch sej přeje, zo bychu serbske wosady kaž hewak 2. julija z wašnjom na tym dnju w procesionach z družkami na hnadowne městno přišli. Putniska Boža mša z biskopom Kochom zahaji so w 10.30 hodź. na luce. Po přestawce ze samozastaranjom a programje so putnikowanje z nyšporom, kotryž započnje so w 14 hodź., zakónči. Procesiony so do wosadow pěši njewróća.

Narodninska party – K stoćinam zbóžneho Alojsa młodžinski festival

Sta młodostnych z Łužicy, wšeho biskopstwa, druhich dželow Němskeje a z Čěskeje kaž tež Pólskeje wočakuja so w Radworju spočatk julija. Z młodžinskim festivalom, kotryž zahaji so pjatk 4. julija, w 17 hodž., woswjeća tam 100. narodniny zbóžneho Alojsa Andrickeho. Hłowny organizator je nimo Radworskeje wosady franciskanski pater Paulus Maria Tautz, kotryž je hižo wjackróc we Łužicy pobył. Z poľnej zahoritosću młodym ludžom wěru spřistupnja, wužijo k tomu mjez druhim hudźbu, kotraž młodostnych „ze stólca storhnje“. Tak poskići so na přěnim dnju po wječeri w 20 hodž. koncert z rockowymi skupinami z Jendźelskeje, Irskeje, Awstriskeje a Němskeje. Workshopy a koncert wočakuje młodostnych sobotu, 5. julija. Wječor přidruži so biskop Heiner Koch. Po Božej mši scěhuje „nightfever special“ a w poľnocy so narodninska torta nakraje. Nazajtra podadźa so wšitcy do Róžanta na diecezanske putnikowanje. Přizjewić móža so zajimcy pod www.Alojs100.de.

Ministrantska kopańca

Tradicionalny koparski turněr serbskich ministrantow budže lětsa sobotu, 5. julija, w Pěskecach. Započatk je w 9.00 hodž. z Božej mšu we wjesnej cyrkwičce. Mustwa měli so hač do póndžele, 30. junija, w běrowje dekanatneho dušepastyrstwa we Worklecach pod telefonowym čisłom (03 57 96) 8 87 07 přizjewić.

Zetkanje Częstochowskich putnikow

Tež lětsa pozbudźa farar Beno Jakubaš, so w serbskej skupinje na putnikowanje z Warszawy do Częstochowy podać. Hić smě kóždy sobu, kotryž je 18. žiwjenske lěto docpěł. Termin putnikowanja je wot 5. do 15. awgusta. Zajimcy njech so hač do njedźele, 29. junija, pola fararja Bena Jakubaša w Njebjelčicach přizjewja, telefonowe čisło (0 35 78) 30 20 05. Zetkanje wšitkich putnikow budže štwórtk, 3. julija, w 20 hodž. w Njebjelčicach na farje.

Putnikowanje młodžiny do Krupki

Młodostni wot 16 lět su přeprašeni, wot njedźele, 27. julija, hač do pjatka, 1. awgusta, do Krupki putnikować. Přizjewić móža so hač do pjatka, 27. junija, na farje w Chróścicach, telefonowe čisło (03 57 96) 8 04 00. Po tym so hižo žane přizjewjenja njepríwozmu. Putnicy zetkaja so njedźelu, 29. junija, po nyšporje w Chróścicach na farje. Za wšitkich nowačkow je tute zetkanje winowatosć. Nyšpor je w 14 hodž. Putniska Boža mša w Krupce budže srjedu, 30. julija, w 10 hodž.